

Месяца септемвриа в 11-й день
Преподобнаго Силуана Афонскаго
На велицей вечерни
Блажен муж: 1-й антифон. На Господи, воззвах: стихиры
Попразднства

Рождества Пресвятыя Богородицы на 3, и святого на 6, глас 5:
Приидите, людие Божии,/ с лики святых и Ангел составим
духовное торжество,/ в нем бо Церковь земная божественне с
Небесней ликовствует:/ ныне верный делатель вертограда
Приснодевы Богородицы/ во Иерусалим Горний приемлется/ и,
яко муж желанный,/ у Престола Божия славою и честию
венчается,/ радость спасения нам предвозвещает,/ егда горением
любве его ко Господу воспламенимся.

Приидите, Матере Божия сподвижницы/ и постническаго жития
ревнителие,/ со пустыннолюбцы горы Афонския трапезы
божественныя сопричастницы будем./ Ныне Пречистая Мати
Божия,/ Силуана, подвижника нова и предивна,/ егоже диавол
искаше поглотити, спасла есть,/ и Церкви Небесней на радость
приведе,/ и, яко фимиам благовонный,/ молитвенника тепла за
нас у Престола Божия постави,/ венцем лепоты неувядаемыя
увенчана.

Приидите, монашескаго подвига щедролубцы,/ встаните,
уневестившиися Христу,/ да Силуана богомудреннаго,/ подвигом
равноангельским украшена, узрим,/ и сему, козни вражия
победившему,/ радующеся, возопиим:/ радуйся, родителей
благочестивых плод целомудренныя чистоты;/ радуйся,
облагодатствованный щедротами божественныя доброты;/
радуйся, веры чистыя и незлобия дивное воплощение;/ радуйся,
постом и молитвою стяжавый Христово всепрощение.

О, преблаженне отче Силуане,/ Небеснаго Утешителя
дориносителю предивный,/ и пламени любве Божия сосуде
неистошимый,/ тебе припадающе, вопием:/ Егоже всем сердцем
возлюбил еси,/ Егоже ради в Горе Афонстей молитвою слезною за
мир сраспинался еси,/ не престай и ныне умоляти/ Церкви Святей
от зол избавление даровати,/ людем же, греховными соблазны
обуреваемым,/ мир и велию милость.

Слава, глас 6:

Веселися и радуйся, Горо Святая,/ Вратарницы Небесныя
омофором присно украшаемая,/ Церковь Российская, възиграй,
ликовствующи./ Ныне христоролюбивии людие,/ от восток солнца
до запад,/ вечери Агнца Божия приуготовляются,/ Силуана
Богомудреннаго доброты порфирию украшаются./ С нимиже и
мы, сему братолюбия учителю,/ память празднующе, сладце
вопием:/ радуйся, севера благодатное сияние,/ в вертограде
Афонстем святыя Руси светлое отражение;/ радуйся, Ангеле
молитвы слезныя,/ Богу приносимыя о всей вселенней;/ моли о
нас Господа, братолюбием оскудевающих.

И ныне, Богородичен Попразднства.

Таже вход. Прокимен дне. И чтения преподобническая.

На стиховне стихиры, глас 2.

Подобен: Егда от Древа:

Светом невечерним Святыя Троицы просвещен,/ ношь житейскую
без претыкания прешел еси,/ богомудре Силуане,/ видении
божественными возвышался,/ во дворех Бога Вышняго вселился
еси./ Темже и нас наследники Того соделай,/ святую твою память
почитающих.

Стих: Честна пред Господем смерть преподобных Его.

Земная вся оставив,/ богатство и славу яко прах вменив,/ Гору
Святую слезами твоими оросил еси/ и, невозвратным желанием
Единому Богу приближаяся,/ Сему ангельски послужил еси./
Егоже моли, преподобне,/ в книзе жизни написатися
почитающим тя.

Стих: Блажен муж, бояйся Господа, в заповедех Его восхощет зело.
Не престай моляся, отче Силуане,/ о неключимых рабех твоих,/
ихже богомудренным твоим житием просветивый,/ Богу
приразил еси,/ да вси честное преставление твое светло почитаем.
Слава, глас тойже:

О, всеблаженне отче Силуане,/ богатства некрадомаго стяжателью
премудрый,/ молитву яко хлеб, слезы яко елей вмения/ и, якоже
Павел, богомудрый,/ о Кресте Господнем радуяся,/ Солнцу
Правды горением любви утренивал еси;/ стяжанию Духа Святаго
нас научавши прилежно.

И ныне, Богородичен Попрзднства.

Тропарь, глас 2:

Серафимския любви ко Господу пламенный ревнителю/ и
Иеремии, о народе плачущему,/ усердный подражателю,/
всеблаженне отче Силуане,/ ты бо, зову Матере Господа Сил
внемлай,/ змия греховнаго мужемудренно изрыгнул еси/ и в Гору
Афонскую от суеты мира удалился еси,/ идеже в трудех и
молитвах со слезами/ благодать Святаго Духа обильно стяжал./
Еюже сердца наша воспламени/ и с тобою умильно взывати
укрепи:/ Господи мой, Жизне моя и Радосте Святая,/ спаси мир и
нас от всяких лютых.

И ныне, Богородичен Попрзднства.

На утрени

На Бог Господь: тропарь Праздника, дважды. Слава, святому. И
ныне, Попрзднства.

По 1-м стихословии седален, глас 5:

Горы и холми, възграйте, пустыня Афонская, возвеселися,/ днесь
бо обитель Целителя безсребреннаго, утрениющи, песнь
приносит Владыце:/ воспойте Господеви песнь нову, яко дивна
сотвори Господь,/ возведе от нас к Едему горнему молитвенника
за мир неусыпна,/ Силуана богомудраго.

Слава, и ныне, Попрзднства, или Богородичен, глас тойже:
Потребися всяка печаль Рождеством Твоим,/ и отъят Господь
рыдание и плач и всяку слезу от лица земнородных, Чистая

Богородице:/ о Тебе, Неискусобрачная, и мы радости исполняемся.

По 2-м стихословии седален, глас тойже:

Погребл еси страстей востание умерщвлением плоти, преподобне отче,/ радость жизни безконечныя по смерти приял еси,/ темже днесь Христова Церковь празднует твою досточудную память,/ отцев Афонских украшение.

Слава, и ныне, Попразднства, или Богородичен:

Оружием нас сладости греховныя уязвленных и лежащих в ранах неисцельных,/ Пречистая Богородице, не презри, но исцели/ копием и Кровию распеншагося за ны Сына Твоего и Бога нашего.

По полиелеи седален, глас 1.

Подобен: Гроб Твой, Спасе:

От юности на гору безстрастия возшел еси,/ и, яко ветвь масличная, корне земли Российскойя,/ в пустыни Афонстей житием непорочным процвел еси, предивне отче Силуане,/ и, яко новый тайновидец, благодать боговедения стяжал еси,/ и дерзновением Илииным ко Господу зывал еси:/ Господи, спаси мир, во зле обуреваемый.

Слава, и ныне, Попразднства, или Богородичен, глас тойже:

Настави нас на путь покаяния, уклоншихся к безпутием зол и Преблагаго прогневавших Господа,/ неискусобрачная Преблагословенная Мати, мира всего и Горы Афонския надежде непререкаемая.

Таже степенна, 1-й антифон 4-го гласа. Прокимен, глас 4: Честна пред Господем/ смерть преподобных его. Стих: Что воздам Господеву о всех, яже воздаде ми? Всякое дыхание: Евангелие от Матфея, зачало 43.

По 50-м псалме стихира, глас 6:

Преподобне отче Силуане,/ во всю землю изыде вещание исправлений твоих,/ тем на Небесех обрел еси мзду трудов твоих,/ демонския погубил еси полки/ и Ангельския достигл еси чины,/ ихже житию без порока поревновал еси,/ дерзновение имея ко Христу Богу,/ мир испроси душам нашим и велию милость.

Канон Попразднства на 8, и святому на 6.

Канон святому, глас 5.

Песнь 1

Ирмос: Спасителю Богу,/ в мори люди немокрыми ногами наставльшему/ и фараона со всевоинством потопльшему,/ Тому Единому поим, яко прославися.

Ума чистотою зову Матере Господа Сил внемляй,/ змия, грех пораждающаго, изрыгнул еси,/ и зыграся дух твой о Бозе Спасе твоём, боголюбиве отче Силуане,/ Егоже моли о чтущих память твою.

К тебе, крест твой взявшему и на гору безстрастия возшедшему,/ припадающе, молимся, всеблаженне:/ воспламени сердца наша ко всех любящему Богу,/ пламенем любви твоея, в горении неугасающем.

Егоже возлюби душа твоя, Сему уверился еси,/ и к Нему Единому прилепился еси, боголюбче,/ и сице искусителя злолукаваго души твоя покорил еси,/ трудом, бдением, смирением и слезною молитвою сего посрамляя.

Слава: Господи Сил, освящай всякаго человека, грядущаго в мир,/ даждь слово хваления устом моим,/ да превознесу Трисвятое Имя Твое, дивно во святых Твоих почивающее,/ с нимиже и Силуан, возлюбленный Твой, молит Тя о душах наших. И ныне: Скорбных наведения обуревают убогую мою душу,/ и напастей облацы мое покрывают сердце, Богоневесто,/ но, Свет рождающая Божественный и превечный,/ возсияй мне свет радости, молитвами Силуана, угодника Твоего.

Песнь 3

Ирмос: Силою Креста Твоего, Христе,/ утверди мое помышление,/ во еже пети и славити/ спасительное Твое Воскресение.

Кто исповесть страдания души твоя, преподобне Силуане,/ егда дух злобы поднебесныя претяше ти,/ от Господа удалити душу твою зложелаше./ Сетей сего лукаваго избави и нас, молитвенниче о всей вселенней.

Силою терпения и красотою смирения душа твоя, всеблаженне,/ храма Духу Святому устройся, сего ради взывал еси:/ о людие, творение Божие, познайте Творца/ и любовь к Нему прилепитесь.

Источник радостей твоих и лоно мыслей твоих/ Имя Бога Вышняго бысть, отче Силуане,/ к Нему прилепитися и в Нем утвердиться/ молитвами твоими помози нам, к тебе прибегающим.

Слава: Господи, Господи, даруй силу Твоя благодати,/ да познают Тебе вси людие Духом Святым,/ взываем к Тебе умильно, якоже возлюбленный Твой,/ любовь к Тебе распалаямый, Силуан предивный.

И ныне: Не умолчу вопити яснейше величия Твоя:/ аще бо не Ты, Откровице,/ всегда предстояла, молящи о мне Сына Твоего,/ кто бы толика бури и лютых бед избавил мя.

Седален, глас 4:

Жаждею по Бозе возревновав, отче наш Силуане, землю отеческую оставил еси,/ и со пустыннолюбцы Горы Афонския длани твоя поработати Господеву всеусерднейше распростерл еси,/ идеже равноангельскими труды твоими вертоград Владычицы мира преукрасил еси/ и, яко благовоние, Церкви Вселенстей возблагоухал еси,/ лозо винограда новаго, Духом Святым облагодатствованная.

Слава, и ныне, Богородичен, глас тойже:

Несть возможно исчислити величия Твоя, Богородице,/ ниже изрещи неизследимую паче ума силу чудес Твоих, совершаемых выну,/ любовь Тя чтущим и верою поклоняющимся,/ яко воистинну Бога Рождающей.

Песнь 4

Ирмос: Услышах слух силы Креста,/ яко рай отверзся им,/ и возопих:/ слава силе Твоей, Господи.

Яко пчела трудолюбная, постом и молитвою к Богу прилежал еси/ и Богородицу Пречистую мир не оставляя слезно умолял еси,/ отче преподобне, не престай и ныне о нас молиться,/ яко имаши дерзновение велие.

Кладязь новый благодати неисчерпаемая в Горе Афонстей явился еси, всеблаженне,/ из негоже, паче меда и сота,/ сладость любви Христовы Духом Святым источается,/ еуже в горести греховней улади сердца наша.

Господу, рекшу: идеже есть сокровище ваше, ту будет и сердце ваше, - / благоволи убо, о всеблаженне, с тобою Тому взывати:/ Господи, Духом Твоим Святым даждь сердцу моему жажду,/ да никогдаже Тобою насыщуся.

Слава: Яко жертву благовонную и непорочную,/ принеси молитвы твоя за ны ко Пресвятей Троице, преподобне отче наш,/ и милости испроси ненавидящим и враждующим на нас,/ и их, и нас избави от всякия скорби и печали.

И ныне: Тя, Чистую, Тя, Деву Нескверную, Едину имам стену неборимую,/ прибежище, покров крепок, оружие спасения,/ не презри мене, блуднаго, Надеждо надеемых,/ немощствующих помощи, радости оскорбляемых и заступление.

Песнь 5

Ирмос: Утренююще, вопием Ти:/ Господи, спаси ны,/ Ты бо еси Бог наш,/ разве бо Тебе, иного не знаем.

Ты, Господи, создал мя еси и святым Крещением просветил мя еси,/ Ты прощаеши грехи моя и даруеши причащаться Тела Твоего и крове,/ даруй ми силу всегда пребывать в Тебе,/ Силуаново рыдание приношу Ти, Боже наш.

Ума моего омрачение и страстей телесных обуревание/ твоими молитвами, всеблаженне, просвети и утиши,/ якоже дерзнул еси укротити волны морския,/ не терпя видети рыбаги гибельными ветры обуреваемы.

Недостойными усты приносимое тебе убогое хваление наше,/ преподобне, не презри, но прими/ и воспевающих память твою молитвою посети,/ бед и напастей и вечнаго мучения избави,/ да не постыдимся, на тя уповающе.

Слава: Якоже горлица пустыннолюбная, от стражи утренния до нощи/ воспевати Троицу Единосущную и Нераздельную/ со пустыннолюбцы Горы Святыя прилежал еси, отче Силуане,/ умилоствления мертвым, живым и грядущим ходатайствуй.

И ныне: Кий дар благодарения принесу Ти, Богородице,/ яко насладихся Твоих дарований и Твоя безмерная благодати?/ Темже убо песнословлю и величаю/ Твою неизреченную ко мне милость.

Песнь 6

Ирмос: Обыде мя бездна,/ гроб мне кит бысть,/ аз же возопих к Тебе, Человеколюбцу,/ и спасе мя десница Твоя, Господи.

Святителие и священницы, иноцы и вси людие,/ радующесе,
вкупе прославите Бога и Пречистую Матерь Его,/ кадило новое,
молитву чистую, Силуана, пламенем Духа Святаго горяща,/ у
Престола Небеснаго за нас приявших.

Возвеселися, Гора Афонская, со пустыннолюбцы твоими/ и во
псалмех и пениих и песнех духовных воскликни Богу:/ да угоден
будет пред Лицем Твоим
верный слуга Твой,/ егоже молитвами благодать новая Церкви
Святей даровася.

Приидите, вси вернии, со пустыннолюбцы Горы Святыя,/ память
праведнаго с похвалами почтим, взывающе:/ вознесите Господа
Бога нашего и поклоняйтесь в горе святей Его/ дивно во святых
Своих Почивающему.

Слава: Боже, кто уподобится Тебе? Ты Един Вышний по всей
земли./ Мы же, равноангельному смирению раба Твоего
внемлюще,/ образу и подобию Твоему Духом Святым чаем
обновитися.

И ныне: Не скрью глубины Твоих щедрот, и тока безмерных
чудес,/ и источника приснотекущаго воистинну еже ко мне
милости Твоя, Богородице:/ но всем исповедую, и вопию, и
вещаю.

Кондак, глас 2:

Смиреномудрия исповедниче предивный/ и человеколюбия
Духом Святым согреваемая доброто,/ Богу возлюбленне Силуане,/
о подвизе твоём Церковь Российская радуется,/ иноцы же Горы
Афонския и вси христианстии людие,/ веселящесе, сыновней
любвию к Богу устремляются./ Егоже моли о нас, равноангельне
боговедче,/ во еже спастися нам, в горении любви тебе
подражающим.

Икос:

Имея богатство благодати, во еже духом на Небеса возведену
быти,/ воистинну радости неизреченныя сподобился еси, отче
преблаженне Силуане./ Егда бо, вне образов мира, в созерцании
безмерно любящаго Христа Бога Лице видети сподобился еси,/
тогда, Духом Святым укрепляемь,/ в вертограде
Преблагословенныя Богоматере Тому всеусерднейше послужил
еси./ Егоже моли, равноангельне боговедче,/ во еже спастися нам,
в горении любви тебе подражающим.

Песнь 7

Ирмос: В печи огненной/ песнословцы спасый отроки,/
благословен Бог/ отец наших.

Иго благое, бремя легкое Христа Спаса возьму,/ и ветрилом Духа
Святаго, в страхе божественном,/ к пристанищу благоотпущному
корабль душевный твой управил еси, отче Силуане,/ монахом, в
подвизе изнемогающим, образе предивный.

Како не дивимся смирению и человеколюбию твоему, Силуане
предобре,/ видяще ты слезы источающа/ и о сущих во аде и
нераскаянных грешницех рыданными сраспинающася,/ врагом же

своим прощения просяща, всепрощению Христову подражающа.
Псаломски восклицая: видена быша шествия Твоя, Боже,/ шествия Бога моего и Царя, Иже во святем, - / Сего воистинну в лице отца духовнаго Авраамия зрети сподобился еси,/ чтити наставники наша благодатне нас наставляя, Силуане боговедче. Слава: Образ начертаний добродетельных деяний сый, смирен же и кроток,/ и наставник добрый монашествующим в Горе Афонстей показался еси, Силуане,/ сего ради монаси и мирстии/ предстательству твоему пред Богом вверяются.

И ныне: Покров буди и предстательство, и заступление, и похвала, Дево,/ обнажену мне ныне всякия помощи,/ беспомощных сило и надеждо ненадеемых,/ Силуана молитвами, солнца теплейшими.

Песнь 8

Ирмос: Из Отца прежде век рожденнаго Сына и Бога/ и в последняя лета воплощеннаго от Девы Матере,/ священницы, пойте,/ людие, превозносите во вся веки.

Воздеяние рук наших приими, преподобне,/ Владычней благодати подобяся, прегрешения наша презирая,/ ты бо душу твою уязвил еси Христовою любовью и Пречистая Его Матере,/ Еюже умоли спасти души наша.

Яко крин предивный и сапфир пречудный,/ в вертограде Пречистыя процвел еси, преподобне Силуане,/ Владыце твоему Христу смиренно ревнуя, выше бо человека восприем житие,/ имже многих души Господу приводиши.

Воистинну носитель даров Святаго Духа был еси/ и различными добродетельми украшен, Силуане,/ смирением горнюю высоту наследив, нищетою Небесное богатство изрядно приял еси./ Наследники сего покажи ны, молитвами твоими.

Слава: Сияния Божественнаго и Духа Святаго сладости причастника показа тя Господь, отче Силуане,/ егда в неизреченнем Фаворстем сиянии тя посетил есть./ Зрети славу Сего в свете блистания Божества Его/ сподоби и нас, молимтися. И ныне: Пречистая Владычице, Небесных сил превышшая,/ рождшая Спаса, всех Содетеля, Единосушна Отцу и Духу,/ даждь нам слово, Препетая, яко да возможем пети Тя,/ Сушную Заступницу рода нашего.

Песнь 9

Ирмос: Тя, паче ума и словесе Матерь Божию,/ в лето Безлетнаго/ неизреченно рождшую, / вернии, единомудренно величаем.

В житии подвижника предивна, по смерти же молитвенника/ и сострадателя за ны пред Богом изрядна познахом тя, преподобне,/ егда иеродиакона Давида, смертельно отравлена, посещением твоим внезапно исцелил еси,/ покаяния время сему исходатайствовав усердно.

Земли Российския сосуде избранный и Горы Афонския подвижнике новый,/ угоднике Божий Силуане, простри длани твоя за ны ко Господу/ и, яко миро благовонное, молитвы вознеси,/ да спасет от смерти души наша.

Ангелом единоправна и святым сопричастна/ к горнему Сиону
призва ты Господь, преподобне,/ идеже вознеси молитвы твоя за
ны ко всех Владыце,/ ходатайствуя о Святей Церкви и нас, чтущих
память твою сладкопесенно.

Слава: Огнем купину не опалившего и пламенными языки
Церковь Христову освятившего,/ смирения твоего ради, Духом
Святым возжжен был еси, отче предивне,/ да житием нескверным
научиши ны поклоняться Троице, всех Богу,/ пламенем любви
твоея к Нему приближающихся.

И ныне: Яко всех Царицу и Владычицу нашу,/ Тя любовию
славим, Пречистая Дево,/ просвещшийся страстьми Сына Твоего
и познавший Сего всем Благодетеля./ Слава благодати Его во вся
веки.

Светилен, глас 4:

Света немеркнушаго блистанием украсился еси, преподобне отче
наш Силуане,/ и предстоиши вечно престолу славы Троицаго
Божества, о Дусе Святем ликовствуй./ Благодати сея испроси и
нам,/ да молитвами твоими причастницы жизни вечныя будем.

И ныне, Богородичен, глас тойже:

Осиянием Твоим просвети наша помышления, и сердца, и разум,
Мати Безвестная,/ яко да стезями жизни право ходяще, милость
получим,/ возвещающе присно хвалы Твоя.

На хвалитех стихире святаго на 4, глас 4.

Подобен: Дал еси знамение:

Любве Божия пламенный рачителю/ и Духа Святаго усерднейший
стяжателю,/ преподобне отче Силуане,/ Егоже ветрилы страсти
душевныя в сердца твоем,/ яко на мельнице, истерл еси,/ и сице
хлеб ангельский вкусив,/ темже, икономе добрейший, питаеши и
нас,/ да причастницы жизни вечныя будем.

Кладязь новый, воды живыя преисполненный,/ в Горе Афонстей
источися,/ слезы молитвы твоя, преподобне Силуане,/ ихже, яко
миро нарда чиста многоценна,/ у ног Господа нашего источал
еси,/ мертвым, живым и грядущим умиловления прося./ Сея
молитвы не лиши и нас, преподобне,/ в мори житейстем грехми
обуреваемых.

Образ смирения Христова и любви Его/ житием твоим показал
еси, преподобне,/ слезно взывая:/ братие, любите враги ваша,/ сии бо суть братия ваша,/ враг же наш диавол есть,/ сице бо
средостение греха разрушается,/ и злоухищрения диавола
побеждаются,/ и мир Божий в человецех водворяется,/ творящий
же сия не подвижатся в правде Божией во веки.

Свещу, мрак греховный просвещающую,/ показа ты Господь,
боголюбиве Силуане,/ да к тебе, человеколюбием избилующу,/ за
томящихся во аде страдати желающую,/ в надежди спасения
припадающе, вопием:/ слез твоих теченьми очисти прегрешения
наша/ и исцели души наша,/ да не лишени будем любви
Христовы,/ егда явится в день Судный.

Слава, глас 6:

Приидите, вси Христу любовию утренююще,/ да радости подвижника предивнаго причастницы будем:/ ныне Ангели на Небесех/ и человецы на земли радуются,/ се бо Пречистая Мати/ от юдоли греховныя,/ яко овча обретенное,/ Силуана, смирением украшена,/ во двор овец Христовых приведе,/ величие его подвига веры,/ яко жертву непорочную,/ во Святая Святых вознесе,/ да видяще, како любит Господь верных Своих,/ и мы Царствию Христову приобщимся.

И ныне, Богородичен.

Славословие великое. И отпуст.

На Литургии

Блаженны от канона святого, песнь 3-я и 6-я. Прокимен, Апостол, Аллилуиа и Евангелие преподобнаго.

Убогая похвала равноангельскому подвигу нашего святого соотечественника — афонского старца Силуана, от смиренного паломника на Святую Гору Афон недостойного Архиепископа Харьковского и Богодуховского НИКОДИМА.